

善，則及己及人，化己化人，方是真道，學道諸子，應問耕耘，不言收穫，見善從善，棄惡親善，能如是者，則禍不及身，福從善種也，能立善德，莫言己身，身爲仙佛，心無此心，勿徒妄念，勿嗜慾嘖，見道行道，隨緣隨數，富貴者勿驕，貧窮者勿慮，作善不言，立德不云，能如斯者，自身不證於仙神，亦留餘蔭於後人也，韶華不再，轉瞬白頭，一刻韶光，勿忘於道，學道諸子，願同勉之。

呂祖先師示

丙午潤三月初四日（一九六六）

外修爲本，內煉爲輔，一經果證，便可還真

玄功內外要雙修，外功十足真自求，
堪嘆世人多夢想，成仙成佛大羅遊。

玄妙至理，內外同修，方能止於聖域，若憑內法以證真道者，除早具慧根外，實無幾人，學道之士，多未明此理，內外二途，應以外修爲本，內煉爲輔，天地之生人也，具有人身，經云：「人身難得。」難得者何，因人既有形體，處於風塵俗海之中，有此優異條件，無事不可爲，善善皆可作，若只具性靈而無軀體者，任有神通廣大，外功方面，亦難爲也，人則不同，見善行善，聞德立德，一念之誠，天地可格，登高一呼，衆志成城，又曰：公門之內，正好修行，凡此種種，般般人爲，性靈則難以爲之者。上古中古之修道者，每以爲閉關煉性，鎮日內煉，視世故如等閒，避六親而靜養，善不爲善，惡不爲惡，

十年苦坐，便可抱道見真，自我修行，只求入化出神，不知立功立德，若如此而能入仙聖之域者，則九天之內，皆爲大羅仙子，人神二道，從此絕跡矣，不明真理者，類多如是，吾曾有言：「外功方六七，內煉二三成。」亦即曉喻衆生，勿因內而忽外也，古今先進之聖仙前輩，類多俱備外功而入聖域者，或問曰，外功十足矣，內煉無一成，三品不聚，性靈何能合一，吾告之曰：「功滿之日，重淨性靈，煉性之地，多如牛毛，各洞各府，即修性之地也，倘外功俱無，全神內煉者，雖煉至入化出神，三品合一，性雖現而無外功之助，亦一靈性之遊魂耳，天庭無位，大羅不收，煉性者，屆時雖欲行外功以補不足，獨惜皮囊已脫，人身化造，又焉可得耶。」晚近百年，述古老人迴龍祖師，創同善於人間，度衆生修真之本，純以密傳內法，使衆生外修之餘，加強內煉，一經果證，便可還真，創始之初，邀吾相助，舉凡三界之內，勿論儒釋道三教前輩，凡有普度衆生之願念者，吾當極力而助之，因度世之方，固吾所願也，惟以晚近人心，私念疊起，惡勞好逸，避外修內，火宅遍傳，得真者也不多见，是故內外二途，外爲主而內爲輔，若行外功而無暇內修者，亦可證道，倘專修內而忽諸外，亦難證於一道也，尤以今日三期末劫，火宅修行，到處塵囂，難覓清靜之地，兼以人道所負凡俗之責，更難於靜養，試問內修弟子，功課如何，撫心自問，當能明之，故今特爲內外二途，闡述詳明，俾衆子弟有所覺耳。

呂祖先師示 丙午三月十五日（一九六六）

信、念、行、虔、修、煉、六字，實爲道之本

護法護人兼護道，諸生從此見真功。

禍福無門，常生意外，一道可以養生，一道亦可葆命，立身安命，孔聖所云然，慎修慎行，玄真常現，尤以晚近凶災叠叠，厄禍常生，大好之人間，恰似幽靈鬼域，不觀乎居此塵囂鬧市，衆生終日奔走忙忙，誠惶誠恐，徬徨不可以終日，此無他，非名即利耳，爲名利而求生存，爲養生而奔勞駭汗，嗟乎，忙忙衆生走，名利何處有，有時遇無常，享用能長久，觀此，一道之微，盡照人生真諦。

丁未屬春，又時值暮春之期，天地之兆，今已略現矣，炎夏將盡，天厄亦降，羣仙大會，已定於五月端午日。

天皇頒詔，羣仙獻議，集衆力以挽蒼生，盡玄妙以濟世人，此會六十年來之一次也，而玉清虛宮，亦響應斯會，召集各門人，羣力羣策，在天地之間，藉神力或神功，助消劫孽，今後三才之中，合力以謀，消彌禍劫，諸子能以一德之微，以獻於道，以一善之念，而輔於道，能如是，則三才合一，其力無窮也。

呂祖先師示 丁未三月十五日（一九六七）

苦煉修行，若無善德爲輔，難修果證

證道應從道裏求，葆真明性兩雙修，
混元一炁成一體，造化先天不用留。

道之行也，如日月之循軌，道無量，天地可容，衆生修道，飄然於宇宙之間，恰如滄海一粟，道之運行，存於人心，心善則道善，心清則道澄，道沛乎人心，倘心靈不昧，則道之行也，正如旭日之初昇，扶搖直指，若彷彿而不覺，則一道之程，恍如四時循環而不息也，晚近火宅修行，道雖易得，眞實難尋，世之所謂得一道者，可無憾矣，豈知一道之中，所得者有差之毫厘，則謬以千里，譬之神道一途，亦屬於一道，仙聖之門，亦名曰道，以至釋家之理，亦曰佛道，道也者，眞之謂也，今日衆生，學道者多，而成眞道者少，若謂神道如何，則道之微末耳，是故學道易，修眞難，成眞道者，行之維艱也，古往今來，先聖仙賢，指眞返璞，雖云苦煉苦修，但無善德以輔之，難修果證，爲使衆生明眞理，養眞性，葆眞命，揭眞心，了眞性，故分別闡述內外二門，俾衆習之，以助一道之修養，全眞闡法，輔助悟之不逮，內外二門，本應早已全部面世，惟以天運所限，中途二缺，此實非天心之所願，人心使之，諸子習道，素有恆心，明乎於一道者亦衆，吾曾言，待機緣一至，自當接續分別闡述，曾因而叩請於

太上曰，衆生能修，道自可求，衆生能行，眞亦保留，衆生能煉，內外續延，觀察衆生，期以一年。

太上如是曰，此舉約在週年紀念後，當可行之也。

太上已多年不降塵寰矣，倘內外篇續行闡出，則須有勞道駕，諸子目前服務亦佳，所願當能得償也，尤以最近

九天仙聖，以諸仙會近在眉睫，各高眞及各仙聖，最爲繁忙。

太上亦頻頻往來於 中天，共參大計，諸弟子既以虔誠之念，更應具願行之力，以參玄妙之功，已得者不可失之，未得者起而得之，則一道之微，存乎其中也。

濟世聖佛示 丁未三月二十二日（一九六七）

寶誕訓詞

四聖邀同到壇來，美酒紛陳亦妙哉，
敬領天皇一杯酒，醉倒老癩妙高臺。
謹以數言，領謝

四聖

又示：

諸生爲我祝稱觴，杯紅酒綠又芬芳，
莫使老僧歸不得，醉倒靈山夜更長。

哈，哈，哈，美酒壇前莫言他，杯杯嘗試杯杯飲，笑行酒令嘻嘻哈，
暮春多感冒，使人最神疲，酒中何款合，最是五加皮。
這酒甫沾唇，似有臭虫味，細嘗又不然，原來威士忌。

歲月任蹉跎，思懷慨感多，蘇杭逢夏月，遍遍是蓮荷，最是明月夜，遊子思故鄉，美酒當前放，何妨飲薄荷。

靈犀透，真元應運留，師門一柱石，砥柱是中流，造化天地啓，度世上慈舟，諄諄教誨同門後，豐功偉績不望求，玄門之模範，道侶之眞修，仙神同頌祝，祝壽祝千秋。

呂祖先師示 戊申九月初三日（一九六八）

再論外修爲主，內煉爲副之理

入世應從出世修，混元一炁道眞留，性命雙修仙佛體，外功盈滿內自求。

韶華已逝，轉瞬一週，光陰恰如白駒過隙，人生易老，草木有四時，天地有四季，由少至老，由生而滅，莫不循環因應，川流不息，以應天地，道在天地之中，憑造化之機，應因果之緣，合先後之數，取衆生之智慧，導以玄宗，助其離造化，奪天機，了性命，辨陰陽，越五行，破情欲，明心性，還原復始，一眞在抱，了後還先，在了道之中，應修眞果，修之起源，莫不從外修造起，內煉在我，我有眞假之我，眞我現，則功勳三千，罔絲厘過，在陰陽交錯之中，亦能造化，由溫養而結聖胎，直闖玄關大道，假我現，則陰陽淆亂，太極顛倒，情欲橫生，倘外功不堅，內助法門，勢難眞在，是故玄門闡教天下道場，靡不以外修爲主，內煉爲副，外之範圍廣大，既可隨緣應化，又可凝合行功，合一道之誠以助眞行，惟是內修之門，只求於己，至曰外煉盈滿而內修仍未備者，大可補助之，倘塵海了緣，而外修仍不備，則無可爲也。

本館已成立二週年矣，雖未具顯著之成就，但善德之功，明乎於一道者，亦大不乏人，故天帝晉封 柳仙，以酬其勳勞闡道之意，惟是教化全真，非朝夕可能著效，一心一德，拾級而登，抱願彌堅，常存道本，入世雖曰數十春秋，能了然出世者，則千秋萬載，道炁長存也。

茲值二週年之日，以外內雙修之理闡述之，俾諸門人行道立德，修身養性，未來艱巨正多，更應勉力從一道之真，而了此真道也。

附錄：

柳天尊訓示：

恩師垂訓，金石良言，外內闡明，訓勉後先，天恩浩蕩，愧不敢辭，願同衆子，勉道勉旃。

呂天尊示 戊申九月初九日（一九六八）

自我修行概述

庸才自愧俗塵中，只知一道在中庸，少小曾隨儒宗學，中年慕仰道之風，一生好善嫌邪惡，半世功名未得通，俗世每多情欲客，日如偏重古人風，清初入漢施殘暴，幾許公卿又鑽逢，多財又好沽名弔，顯貴又偏博孔通，富貴雙收防命短，又向南山邀壽功，富者日進千萬斗，貧窮餓殍輾道中，金陵粉黛天不夜，幾多貧病怨蒼穹，我志未成人亦懶，盡觀情

呂祖先師示：

聖佛闡道，句句箴言，處此末世，領悟爲先，能悟之者，亦神亦仙。

鍾離太師示 乙卯四月十五日（一九七五）

先修福慧，後煉虛無

福慧雙修向道行，眞如見性九天登，

明心自可虛無現，踏上雲梯又幾層。

俗世之學道也，多從福慧雙修而起，迨至人道已盡，則進而爲修煉之功，若煉至虛無之境，則丹還已熟，九轉於天矣，此眞道之所在也，學道憑智慧，煉道憑堅心，二者不可或缺，倘有誠志而缺智慧者，成就不大，倘先天所賦予大智大慧者，則一覺千里，後知未發乎於中，已先覺其前，此所謂青出於藍而勝於藍也，古往今來，多不乏如斯之士，唯 孚佑其一也，惟是雖有大智大慧，先知先覺，倘缺於堅忍力行，仍難成大器者，諸道子學道有年，行道亦不淺矣，若行而不懈，堅而且彌，則一道之成，指日可待也，願後學者同共勉之。

呂祖先師示：

太師訓勉，堪作學道南針，字字珠璣，可爲道子之座右銘也，吾門子弟，多不乏智慧之士，先後天俱強者有之，倘能遵 太師所示，細參慢考，即頓覺悟之門，一得則永得，更

從堅忍耐煉以行，則一道之得，當屬自得也，明乎此，于意云何，並叩謝 太師金石訓言也。

華陀先師

白眉先師 三師示 乙卯四月十八日（一九七五）

雲龍祖師

煉道疏於善德，不求外功之助者，難證真道

積善能增德，蔭澤在三才，

自我天地體，生滅又再來，

欲求生大道，真修最妙哉，

循環離六道，靈性達天臺。

世人之爲善也，乃積德之先驅，德能積，則配於三才，德配於天，可得真道，德沛於地，可澤幽冥，德配於人，可蔭衆生，可知一德之微，可沛於萬物也，可知能成真道者，除本性有得外，並可澤於三才，善德雖屬於一道之微，倘修真之士，只顧煉道，而疏於善德者，雖煉至出神入化，而無外功之助，亦難證於真道也，生老病死，乃人生之必經過程，離合悲歡，亦人生之經緯，小厄大難，在人海過程，亦難免者，所謂入世非易，出世更難也，五行所限，緣數所定，變幻所趨，更兼魔障陡生，人生每多遭此而不能自處也，倘明一道之真，玄妙之理，虛實之道，任他如何，均能自覺自處，沉復心明見性，神定而氣

清，精固而不散，如是外道不侵，疾病不臨，學道者，臨此階段，則數緣亦易，到此則超五行而燮陰陽，元性在我，而不由天地也，眞道之理在此，願玄門諸子常參斯言，俾助習道之功也。

關聖天皇帝示 乙卯五月十三日（一九七五）

雖有慧根深厚，仍憑其後天之眞自覺，而達於先覺之境

浩然一正炁，沛乎天地中，
智者爲人傑，仁者亦稱雄，
勇須義相配，迎合道範風，
道中之至理，三教亦同融，
處世應立德，三才也貫通，
世人心不二，無物在心胸，
光明隨即現，學道自從容，
身心兩兼備，同煉一爐紅，
身爲實之相，心靈屬虛空，
正邪能分辨，萬物能執中，
人道能學此，玄妙自能通，